

1. LE ROI DOMINEUR ET TI JEAN TOUPEE

Ti ennan un garcon qui ti appelle Ti Jean. Y ti ennan son vieux maman. Mais Ti Jean son le temps, y ti juste marcher dans bois. Un jour Ti Jean dans son marcher dans bois ti arrive cotte un grand la plaine. Dans ca la plaine ti ennan un grand pied les mats. Comment nous conner Ti Jean y citer dans z'histoire. Y ouler connain qui y ennan en l'air dans ca pied les mats. Ti Jean y dire dans li meme: "Si mon commencer moi fini". Y descende cotte son manman, y dire avec son maman: "Donne moi enne ti l'argent". Son maman y dire li: "Mon p'tit qui ou pour faire avec l'argent?" Y dire: "Monne gagne mon majorite, moi va aller et apres moi va retourner: si mon pas retourner faudrait pas moi Ti Jean".

Ti Jean y descende dans la ville, y acheter deux trois clous, y faire direction foret, y arrive encore cotte ca pied les mats dans la plaine. Lo ca pied les mats ti marquer: RICHE AU PIED: BELLE OU JOLIE AU MILIEU: FLEUR DANS SON COEUR. Ti Jean y dire dans li meme: "Mort ou vivant moi va arriver en l'air". Ti Jean y prend son clous y commence pique dans ca pied les mats, y faire l'escalier en montant. Y commence monter. L'heure y arrive dans milieu ca pied les mats y trouve un la porte. Y ouvert ca la porte, y trouve un grand salon. Y ennan tout sortes qualites manger, boires, cigarettes dans salon. Ti Jean y crier "N'a pas personne la". Y pas entende aucaine tapage. Ti Jean y dire li meme: "Be moi manger mon ventre plein". L'heure y fini manger y boire, y tombe dans un grand fauteuil y assiser, y prend cigarettes y fumer.

Le temps y ti pe assiser dans son fauteuil son cigarette dans son la main, y trouve un cartier y sorti en l'air dans plafond y tombe dans milieu salon. Y sauter, y dire qui pe arrive moi. Le temps y pe dire ca un autre cartier y tomber encore. Ti Jean y dire "Zotte qui mon ti vine faire la". Mais y pas perdu sang froid y dire ya trouver tout ca qui arriver. Pas besoin dire ou Ti Jean Ti Jean meme. Quelques minutes apres y tombe encore un le bras sorti dans plafond; y tombe un autre cote les bras; y tombe un le corps la forme un dimonde et les bras ec la jambe y cole avec ca le corps. Be Ti Jean ti encore pe fumer quand y tombe un la tete, y cole

avec ca le corps y faire la forme un grand z'homme. Mais qui c'etait un geant. Geant y dire avec Ti Jean: "P'tit Jean p'tit bambin qui ou vine faire chez moi?" Ti Jean pas gagne le temps pour causer. Ti Jean y gagne un l'idee y prend son cigarette y casse la cendre dans son la main y faire un la croix y montrer geant. Geant y dire "Pardonne moi Ti Jean". Comme nous connain tout demon y peur la croix. Ti Jean y dire avec geant: "Moi pardonne ou!" Mais quand Ti Jean y dire ca y plus peur geant qui geant y peur li devoir qui geant y grand mais li Ti Jean i p'tit p'tit. Ti Jean y dire avec geant: "Dire moi qui ca veut dire RICHE AU PIED; BELLE OU JOLI AU MILIEU; FLEUR DANS SON COEUR". Geant y dire avec Ti Jean "Riche au pied ca veut dire ou a fouille en bas ca pied les mats ou a trouve l'argent; Belle ou jolie au milieu c'est ca salon qui nous la dans; Fleur dans son coeur c'est un gros la cloche dans le coeur ca pied mat; juste moi qui ennan droit pour sonner". Ti Jean y dire avec Geant: "Aller present, mon pardonne ou". Geant y disparaitre.

Ti Jean y descende lo ca pied les mats, y alle cotte son maman. Son maman y dire avec li: "Ti Jean cotte ou sorti mon piti?" Ti Jean y dire: "Maman pas tout parole qui bon causer, pas tout nouvelles qui bon tender; mon Ti Jean auzordi mon content". Son maman y dire: "Ti Jean be dire moi quine arriver". Ti Jean y dire: "Non maman, plus tard ou a connain; pas tout quette chose qui ou trouver qui ou raconter; faudrait ou gagner avant".

Lendemain beau matin Ti Jean y descende dans la ville y rode trois zommes journee. Ti Jean y dire avec zotte "Ennou alle travail". Zotte demande avec Ti Jean: "Combien ou pour donne nous?" Ti Jean y dire "Ca qui moi donne zotte, zotte a content". Un bande y dire avec Ti Jean: "Be ca pas un condition". Ti Jean y dire: "Mon pas force zotte, si zotte pas ouler". Parmi ca bande zommes ti ennan un bande zotte dire: "M'sie nous a vini!" Ti Jean y dire "Be ennou." Ti Jean y rentrer dans un magasin, y acheter deux trois gonis, la pele, pioche, pique, la pince, zotte faire chemin dans bois. En arrivant cotte ca la plaine cotte ca pied les mats y ete, Ti Jean y dire avec ca bande zommes commence fouiller. Zotte joindre sous, caches, cinq sous, roupies; zotte joindre l'or, diamants. Zotte tire tout zotte

mette en lair. Ca bande zommes zotte dire "Ca qui pas ti ouler vini ca zotte zaffaires; nous a gagne nous dequoi, nous pas a besoin travail avec personne encore". Ti Jean y dire avec ca bande zommes prend tout l'or avec diamants mette dans gonis pour li; prend tout bande l'argent pieces et roupies pour zotte. Ca bande zommes zotte rier, zotte ine fini riche. Ti Jean y dire avec bande zommes charier mette aubord chemin "moi va alle rode charette". Ti Jean y descende y acheter un charette ec deux cheval y monter y prend tous son l'or et diamants y mette lo charette y descende y faire un l'autre chemin. Ca bande zommes y faire zotte chemin pour zotte.

Ti Jean dans son l'autre chemin qui ine faire y joindre un zomme avec un grand morceau la terre lo son la tete. Ti Jean y arette son cheval y demande ca zomme: "Ou un zomme fort?" Y dire "Non m'sie, ou penser croire mon ennan deux boutes la terre; l'heure mon veille lo un boute la terre dimonde y voler lo l'autre boutes la terre; l'heure mon veille ici du monde i vole la bas encore be la a present mon besoin prend tous les deux boutes mette ensemble, comme ca mon veille entier et personne pas a va voler". Ti Jean y demande ca z'homme qui maniere y appeler et z'homme y dire: "Moi mon appele Cargo". Ti Jean y dire jette ca la terre qui lo son la tete et vine marche avec li. "Ca l'argent qui ennan un quantitee et moi paye ou un sou par mois". Z'homme y daccord, y jette ca la terre, zotte aller zotte deux Ti Jean. Le temps zotte a pe aller, Cargo y dire avec Ti Jean: "Be Ti Jean mon pas capab marcher si na pas paquet lo mon la tete". Ti Jean y dire Cargo pas besoin fatigue ou. Cargo y dire: "Non, largue ca deux cheval, donne moi ca bande gonis moi amener; laisse ca bande zanimaux alle rode zotte manger" Ti Jean y prend son bande gonis l'argent y donne ca zomme pour amener, y largue ca deux cheval. Ti Jean ec Gargo zotte continier zotte la route.

Le temps zotte pe marcher zotte joindre un l'autre zomme; ine pointu, ine mete son z'oreille dans la terre. Ti Jean y tappe ca z'homme un calotte lo son derriere. Ca zomme y dire: "M'sie ou gatte mon zaffaire; mon ti a pe ecoute un zaffaire crime qui ti a pe rende jugement Maurice". Ti Jean y demande ca zomme: "Comment ou appeler?" Ca zomme y dire "Couta Couta." "Be combien l'argent

ou gagner pour faire ca?" Ti Jean y demande li. Couta couta y repondre: "Mon gagne un sou par mois". Ti Jean y dire avec li "Travaille ec moi, moi donne ou un cache par mois". Couta Couta y dire li oui.

Present y faire trois zotte; zotte aller. Le temps zotte pe marcher zotte rencontrer un l'autre z'homme quine vire son derriere vers de l'eau sale, ine baisse son la tete en bas. Ti Jean y tappe li enne ti calotte lo son le rein; ca z'homme y largue un canon.... FFFffftttt!!! Ca zomme y dire avec Ti Jean: "M'sie ou a faire moi gagne zaffaire la police; si ou tine tappe moi plus fort ou ti anne faire moi brule tout ca bande bateaux dans la rade". Ti Jean y demande li a cause; zomme y repondre: "Be mon appele Peteur, mon pas ti encore l'heure pour largue mon canon. Y ennan un bataille dans la Mer Mediterranee, zotte pas ouler arreter la guerre. Mon ti pour brule zotte tout". Ti Jean y dire avec Peteur, mais ou un homme capable... "Combien ou gagner par mois?" Ca z'homme y dire "Mon gagne un cache par mois". Ti Jean y dire: "Travaille avec moi et moi donne ou trois sous par mois". Peteur y dire oui.

La present Ti Jean, Cargo, Couta Couta et Peteur zotte aller. Dans ca la ville qui zotte arrive la dans premier, ti ennan un le roi. Ca le roi lo son barreau tine marquer CELUI QUI RENTRE NE SORT JAMAIS: CELUI QUI RACONTE Z'HISTOIRE PLUSSE QUI MON FILLE YA MARIER AVEC MON FILLE ET YA COMMANDE MON TRONE: YA DOIT MOI JUSTE MON MANGER ET MON BOIRE. CELUI QUI PAS CAPAB RACONTE Z'HISTOIRE PLUSSE QUI MON FILLE YA GAGNE LI COU SAUTER. CA MEME QUI DIRE CELUI QUI RENTRE NE SORT JAMAIS. Ti Jean y dire avec son trois dalons: "Moi rentrer cotte ca le roi, espere moi la meme". Zotte dire li oui. Ti Jean y tappe barreau, soldat y ouvert barreau et Ti Jean y dire avec soldat: "Mon ouler trouve le roi". Soldat y dire "Ou trouver qui y marquer lo barreau?" Ti Jean y dire "Naissance un jour! La mort un jour! Mon pas prend un cas avec ca quine marquer lo barreau". Ti Jean y rentrer y dire avec le roi: "Lo ou barreau y marquer celui qui raconte z'histoire plusse qui ou fille ya marier avec ou fille, mais celui qui pas capab ya gagne li cou sauter?" Le roi y dire "Be oui mon garçon, bien

sur." Ti Jean y dire li "Mon roi a mon pour raconte z'histoire ou fille". Le Roi y dire oui, et y ajouter: "Be monte dans l'etage pour raconte z'histoire avec mon fille". Ti Jean y dire avec le Roi: "Mon ennan mon trois dalons dehors, faudrait mon alle cherche zotte. Le roi y dire "Be oui alle cherche zotte". Ti Jean aller. Madame le roi y dire avec le roi: "Lo ou barreau y marquer CELUI QUI RENTRE NE SORT JAMAIS, mais la ca garcon ine rentrer et ine sorti". Le roi y dire: "Mon pas entrain ca, au lieu enne nous a gagne quatre". La reine y dire: "Be ca meme!"

Ti Jean y rentrer avec son trois dalons, y dire zotte: "Espere moi la meme moi alle raconte z'histoire avec ca fille". Le Roi y conduire Ti Jean cotte ca fille. Le roi y dire avec son fille, "Ou pour raconte z'histoire avec Ti Jean". Fille y dire "Oui papa".

Premierement ca fille y commence avec jeux d'mots, y dire avec Ti Jean: "Tic Tic dans coin? Ti Jean y dire "Balier". Ca fille y dire "Bien, Poule ponde dans piquants?" Ti Jean y dire: "La langue". Ca fille y dire: "Soucoupe lo glacis?" Ti Jean y dire: "Ou tete mamzelle". Ti Jean y dire avec princesse: "Be mon tout present". Ca fille y dire li "Non pas pour capab". Ti Jean y dire: "Non oune raconte moi trois, moi raconte ou juste enne". Ca fille y dire "Non pas pour capab." Ti Jean y dire li non. Tapage qui zotte pe faire le roi y besoin vine guetter qui y ennan. Le roi y demander qui y arriver. Ti Jean y dire avec le roi: "Ou fille ine raconte moi trois, mon dire li moi raconte enne, y pas ouler. Le roi y dire "Be oui mon fille, laisse li raconte enne". Fille y reponde: "Be papa, ca ti enne ti jouer". Le roi y dire: "Non mon fille, laisse li raconte enne." Fille y dire Ti Jean raconter.

Be Ti Jean pas tine oublie son p'tit jeux de mot. Y dire avec ca fille: "Riche au pied; belle ou jolie au milieu; fleur dans son coeur?" Ca fille y maginer, y pas connain, y roder dans livre n'a pas. Livre faudrait quatre soldat amener. Y rode encore dans livre n'a pas. Y dire avec Ti Jean: "Mon pas connain!" Ti Jean y gagne pariage. Le roi y dire avec Ti Jean "Ou a marier avec mon fille, ou a commande trone et ou a donne moi juste mon manger". Ti Jean, non mon roi mon

pas mon pas ouler marier avec ou fille, ni pour commande ou trone. Donne moi l'argent qui un homme y capab amener". Le roi y dire "Oui Ti Jean, moi donne ou." Le roi y rempli un gonis avec roupies y donne Ti Jean. Ti Jean y dire avec Cargo: Prend ca sac l'argent, guetter si ou a capab amener". Cargo y dire: "Ti Jean, ca pas paquet pour moi amener; ca paquet un formie". Prend ca sac l'argent y envoie en l'air y gober. Ti Jean y dire avec le roi pas assez l'argent pour un homme amener. Le roi y dire: "Ecoutez moi va amene encore". Le roi y prend deux la toile matelas y coudre ensemble, y change tout son l'argent en cinq sous et roupies y mette dans ca la toile matelas, y faire coudre, y donne Cargo, disant "La la". Cargo y dire "Mon roi ca paquet un mouche". Le roi n'a pas l'argent encore; y fini peur. Y dire avec Ti Jean: "L'argent ine fini, moi va envoie telegramme l'Angleterre moi dire envoie l'argent pour moi paye ou". Ti Jean y dire: "Oui mon roi". Mais le roi y envoie telegramme l'Angleterre y dire envoie l'armee pour li. Y pas demande l'argent. Ti Jean y dire avec le roi: "Be nous a besoin rester la meme jusqu'a l'heure nous l'argent a vini". Le Roi y dire li oui, y donne zotte un la case pour rester la dans.

Un jour Ti Jean son zalumette ine fini, y alle cotte la cuisine le roi pour alle rode un peu du feu. Nainaine la cusine y dire avec son dallon: "Ou rode du feu, corvette pe vini pour donne ou du feu". Mais ca ti un causer contraire pour Ti Jean. Ti Jean y ecouter y dire en li meme "Mais moi zotte pas pour mette mon ame dans bogui." Ti Jean y aller y dire sa avec Couta Couta. Y dire, "Ti Jean, moi ecouter, moi dire ou qui pe passer". Y deacendre bord la mer, y mette son zoreille dans la terre, y ecouter. Y dire avec Ti Jean, "Y ennan sept corvette pe vini pour vine tuer nous. Le roi dans son telegramme y panne dire envoie l'argent, ine dire avec le roi l'Angleterre envoie corvette acause noune vine attaque li." Ti Jean y alle cotte le roi, y dire avec le roi, "Donne moi un pieds cedre." Le roi y dire "Alle prend." Ti Jean y dire avec Cargo, "Alle arrache un pieds cedre pour moi." Zotte alle bord la mer zotte tout les quatres, Cargo y arrache pieds cedre y prend pieds y alle dans un l'endroit masquer. Pour son la force qui y ennan, y plante pieds cedre encore. Peteur y dire avec Ti Jean, "Rode un p'tit galer, amare avec la ligne, monte en l'air

dans pied cedre, l'heure moi dire ou, ou a largue, galer lo mon le rein. Peteur y vire son derriere vers de l'eau sale et y demande Couta Couta: "Quel heure corvettes y capab arriver?" Couta Couta y reponde: "La y pe alle signaler." Corvette y rentrer, captain y guette dans binocle y pas trouve l'armee a terre. Peteur y dire ec Ti Jean: "Largue gale lo mon les rein," Y largue un canon y brule six corvettes. Un corvette y gagne coupe tout son en l'air. Ca corvette y aller, la queu lo le dos. En arrivant l'Angleterre son captain y raconte tout ca quine arriver.

Ici derriere le roi y inquiette. Ti Jean y demande li: "Ca meme l'argent qui oune faire vini?" Le roi y dire "Non l'argent pencore vini." Le roi y envoie encore un telegramme l'Angleterre et la dans y dire pas assez corvettes, envoie encore plusse parceque ca l'armee y terrible. L'Angletette y envoie 28 corvettes ca voyage.

Couta Couta y mette son zoreilles dans la terre y dire avec Peteur: "Y ennan 28 corvettes pe vini, zotte pour arrive lundi beau matin." Peteur y dire "Envoye l'Angleterre entier, moi brule tout." Lundi beau matin zotte alle cotte zotte pied cedre. Peteur y dire Ti Jean monte lo pied cedre... "ca voyage ou a largue galet plus fort." Ti Jean y dire oui.

Juste comment corvette y prend la rade, Peteur y dire Ti Jean larguer. Ti Jean largue galet lo son le rein. Peteur y largue un maman canon, y brule tous les 28 corvettes. Le roi y fini peur; y envoie encore un telegramme, y dire "Envoye encore corvettes, la guerre ine chaud." L'Angleterre y dire li "Demerde ou mon n'a pas encore corvettes pour envoyer." Couta Couta ine tender qui l'Angleterre ine dire. I raconte Ti Jean qui n'a pas encore corvettes pour vini.

Zotte alle cotte le roi. Ti Jean y dire avec le roi: "Mon l'argent!!" Le roi y dire "Pardonne moi Ti Jean." Ti Jean y dire avec Peteur: "Vire avec le roi!!! Le roi y tailler y faire foret, son madame par derriere. Ti Jean y attrappe son fille y dire avec li: "Ou papa ine promette moi ou, ou a besoin rester." Ti Jean y marier avec ca princesse et son trois dalons y rester avec li pour toujours.